

Xajon ra tsikínda jè Santiago

Kó'sín jè Santiago síhixó'ta xit̃a ra tsikínda-l̃a xajon

1 ¹ʼAn ra Santiago 'mì-na, ra chí'nda-l̃a Nainá ma k̃o t̃i'koaá chí'nda-l̃a Jesucristo ra t̃jna ít̃òn-ná, t̃sísxó'tà-no jìòn ra ya inchrabà'ta-no t̃j̃e-l̃a xit̃a naxindá Israel ra tejò kjomà, jìòn ra jndíi ra ján titsajna ta ñánd̃a i'nde-ni ta nga t̃jngo isà'nde.

Kó'sín machjeén nga 'ñó kjó'tatakén jè Nainá
ni'sín kjoa t̃ibatojieén

²Jìòn ra 'ndsé chibé a'ta 'tse Cristo, 'kia nga ni'sín ta mé kjoa ra kotojìòn, ta isaá jnchro jngo kjá tsjaá 'tè-la takòn. ³Ijyeé 'ya jìòn 'kia nga kó'sín t̃já'ta a'ta 'tse kjoa ra makjiín-najìòn, yaá sakò-isa-najìòn nga'ñó kó'sín ma kichíkjoajin-no a'ta 'tse kjoa ra kokama'tin-isa jìòn askan-nioo. ⁴Ko jè nga'ñó ra sakò-no nga nda chíkjoajin-no, ndaá katasíxájin ya inìma-no mé-ni nda katajchá-ni kjobítsjen-l̃a inìma-no, k̃o ngi t̃jna t̃jngo-ni nga nímé ra jchija'ta-l̃a.

⁵Tsa t̃jín i'ka jìòn ra tsìn-no kjobítsjen, t̃jé'tà-la Nainá; tsjá-no ra jè. Nga jé Nainá, ngi koó inìma-l̃a nga tsjá, k̃o mì tsa ta k̃o kjojt̃i-l̃a tsjá 'kia nga yá ra síjé'ta-l̃a. ⁶Tanga ngi nda kjón-ní katakjiín-no 'kia nga síjé; k̃i tà chjàn tà jò 'bè-la takòn; nga jè xit̃a ra jò 'bé-l̃a ikon, 'koaá 'sín ngoya-l̃a koni jè ndáchikon 'kia nga jè t̃jo, ra f̃i ra nchrabá síko. ⁷Jè xit̃a ra k̃o'sín tà jò t̃jín ikon, k̃i tà chjàn k̃o'sín síkítsjen nga t̃jín ra t̃jábé-l̃a ra a'ta 'tse Na'ín-ná. ⁸Nga jè xit̃a ra mì k̃i t̃jínngo ikon, kj'íi 'sín t̃síkítsjen 'ndi 'ndi, k̃o nchijòn ijyeé kj'íi tsò-ni kjobítsjen-l̃a; k̃o mì k̃i ma-l̃a nga kjábé jè ndiyá ra kixi t̃jín.

⁹Tsa t̃jín i'ka 'ndsé ra 'ñó i'in titsajna, tsjaá kata'bé-l̃a ikon, nga ya ngixkon Nainá 'ngaá titsajna. ¹⁰Tanga jñã ra xit̃a

nchiná, tsjaá kata'se-la nga nangi kítsajna ya ngixkon Nainá. Nga jñá ra xita nchiná, 'koaá 'sín kókama'tin koni 'sín ma jè naxó-la xka ijñá ra mì tsa tse fichjin-la. ¹¹'Kia nga bitjo tsá'bi kò 'ñó tsje ma ndabá-la, jè xka ijñá, xì-ní, kò jè naxó-la kàtjen-ngi-ní, kò chija ijye-ní koni 'sín nga nda 'ki isén-la. Jè ra xita nchiná, 'koaá 'sín ta ya kiyájin a'ta 'tse xá ra 'sín, ñánda nga tse síkijnesòn ton-la.

¹²Mé ta nda-la jè xita ra chíkjoa-la 'kia nga tjá'ta. 'Kia nga ijye chíkjoajin-la kjoa ra skoó'ta; tjábé-la kjobinachon ra mì fehe'ta koni 'sín ijye kitsjà tsa'ba Nainá a'ta 'tse jñá xita ra tsjake. Tjábé-la kjobinachon koni tsa jngo corona si'a sko [koni 'sín nga tjábé jngo-la trofeo jñá xita ra síská 'kia nga síkijne]. ¹³Tsa 'kia nga tjá'ta jiòn kò kjoahajin-no nga mejèn-no 'siaan kjoa ra 'cho tjín, kì tà chjàn bixó: “Jé-la Nainá ra kò'sín tíkjó'tá-ná.” Nga jè Nainá mì tsa kò'sín tjín kjobítsjen-la nga 'cho 'sín, kò mì tsa kò'sín mejèn-la nga jñá xita katabátsji-jé. ¹⁴Tanga tsa 'kia jngo xita tjá'ta nga kò'sín 'sín kjoa ra 'cho tjín, tijñá-ni kjoa'cho ra tsjake ra síkjaájin-la kò sískáya-la kjobítsjen-la. ¹⁵'Kia nga ijye matse jè kjoa'cho ra jè matsjake, yaá nchrabá-ni nga batsjén ra kjoa 'tse jé, kò 'kia nga ijye matse jè ra kjoa 'tse jé, akjòn yaá nchrabá jè ra kjobiya.

¹⁶Jiòn ndí 'ndsé ra 'ñó tsjake-no, kì ijo-no chindochá-la. ¹⁷Nga'tsi kjoa ra nda tjín kò ra kixi tjín ra tjábé-ná, yaá i'ngaá nchrabá-ni ra a'ta 'tse Nainá, jè ra tsikínda nga'tsi tsajmì ra síhisen-ná, jè Nainá ra níkjia fahatjìya-la kjonda ra tsjá koni 'sín nga fahatjìya-la jè 'ngién. ¹⁸Jè Nainá, 'koaá 'sín kjomejèn-la nga a'ta 'tse 'én kixi-la kitsin xitse india-né, mé-ni ta nga'tsi ra jè tsikínda, jién komeé koni jñá tsajmì tje ra majchá ítjòn ra jè mangatsja.

Kó'sín machjeén nga ma-ná síhitjasén koni 'sín tsò 'én ra na'yé

¹⁹Jiòn ndí 'ndsé ra tsjake-no, nda katasijin-no kjoa kù, machjeén-ní nga ta tìtsajnanda ki'ta-no nga nda tiná'ya kò nga sisin kjón-ní tinákjoaa 'kia nga mé 'én ra kinákjoaa, kì ta majti nditon-no. ²⁰Jngo xita jtita-kòn, mì tsa kixi tjín kjoa ra 'sín ya ngixkon Nainá. ²¹'Koaá ma-ni, chjáaxìn-la ijo-no nga'tsi kjoa ra tjé tjín kò nga'tsi kjoa'cho ra 'ñó tjín i isà'nde. Ngi kò kjoahimatakòn-no chjíbétjò jè 'én ra ijye ya isitjejin

ya inìma-no, jè ra tjin-la nga'nó nga ma-la kochrekàjin-no kjohi'in.

²²Mi tsa ta ya kjehe'tà nga tiná'ya jè 'én nda-la Nainá; machjeén-ní nga kitjasòn, kò tsa mì ko'sín 'siaan, tjiòn in-chichìndochà-la ijo-no. ²³Jè ra ta 'nchré 'én nda-la Nainá, kò mì kì tsa tísíhitjasòn-ni, 'koaá 'sín jngoya-la koni jngo xita ra kotsíjen-yá chitsín. ²⁴Nda kjón-ní nga kotsíjen'á isén-la, tanga 'kia nga ijye síkáfa-ni í'tsin, ta nditoón 'chaàjin-la kó'ki kjón-ni isén-la. ²⁵Jè ra ngi ya jí'ta xkon kó'sín nga tíchja jè kjotéxoma ra nímé chija'ta-la, kjotéxoma ra síkijnandíí-ná, kò ngi ya tijnajin ki'ta kjobítsjen-la, mì kì tísijchaàjin kó'sín nga tíchja jè kjotéxoma rakii, ta isaá jnchro tísíhitjasòn, jè-ní ra 'nó 'se-la kjotsja 'kia nga ko'sín 'sijn.

²⁶Tsa tjin i'ka xita ra tsò nga 'nó nda bekkón Nainá, tanga tsa mí kì ma-la síkinda jè ndijen-la, tijé tíbíndochà-la ijo-la kò nímé chjí-la nì'sín kítso nga ndaá bekkón Nainá. ²⁷'Kia nga ngi kixi kjoa nga nda 'yaxkén Nainá ra Na'ín-ná koni 'sín nga jè mejèn-la, 'kiaá-ní 'kia nga bisikeé jñà ndí ixti jch'an kò jñà íchjín jch'an ra 'ken 'xin-la 'kia nga in-chibato kjohi'in kò 'kia mì tsa ya tjiníjchájieén ijo-ná jñà kjoa'cho ra tjin i isà'nde.

Mì kì ma ta i'ka-ni xita ra nda síkéé

2 ¹Jiòn ndí 'ndsé, koni 'sín nga makjiín-no a'ta 'tse Na'ín-ná Jesucristo ra jeya tijná, kì tà chjàn ta chjáajion xita xàngioo ra nda sisin-la. ²Tsa ya nãnda nga maxkóya jiòn kjoaha'sen jngo xita nchiná ra tijkjá-la jtongo kò 'nó nda kjòn nikje ra kjiya, tsa tì'koaá kjoaha'sen jngo ndí xita ima ra taxki 'ki ndí nikje ra kjiya, ³tsa jè isa nda sisin-la jiòn jè ra isa nda 'ki nikje-la, nga 'kín-la: “I tijní ijndí, i i'nde nãnda nga nda chon”, kò jè ra ndí xita ima tsa 'kín-la: “Tisen kixi-la itsí ya ijndáa, kò nã tsa 'kín-la: ta ya-la tijná itsí ya a'ta nangi.” ⁴Tsa 'kia nga ko'sín 'sian jiòn, ¿a mí tsa ta in-chichjáhiòn xita ra nda in-chinìsin-la? Kò tjiòn 'cho in-chiníkíhijyo-no kjobítsjen-no 'kia nga ko'sín in-chi'nià.

⁵Jiòn ndí 'ndsé ra 'nó tsjake-no, nda tiná'ya: Jè Nainá jñà jnchro fahájin jñà ra ndí xita ima ra tjin i isà'nde mé-ni nga nímé ra siijchija'ta-la koni 'sín nga makjiín-la nga jñà tjábé-la nga'tsi kjonda ra tjin nãnda nga jè Nainá tibatéxoma, koni 'sín nga ijye kitsjà-la 'én-la jñà xita ra tjin-la kjoa matsjacha

a'ta 'tse Nainá. ⁶Tanga ra jiòn, ta isaá nachrjengio jñà ra ndí xita ima. ¿A mí tsa jñà xita nchiná ra ko'sín beton-najìon ko nga kjo'ñó fiko-no ya ngixkon xitaxá nga bánè jé-no? ⁷¿A mí tsa ti'koa jñà-te ra ko'sín chjajno-la jè 'i-la Cristo ra ya nakjoá-najìon?

⁸Ndaá inchi'nià jiòn, tsa kixi kitií kjoa nga inchnitjasòn jè kjotéxoma ra kitsjà jè Cristo jè ra xitaxá ítjòn-ná ma koni 'sín nga tíchja xajon ra tjí'ta 'én-la Nainá nga tsò: “Ko'sín tsjacha 'tìin xita xàngii koni 'sín nga tsjacha 'nì ijo-li.” ⁹Tanga tsa ta chjaájin-nájiòn xita ra nda nìkòd, inchnifatsji-jé-no 'kia nga ko'sín inchnibatònè-la kjotéxoma, ko tíjé-ni kjotéxoma rakì tíbánè jé-no. ¹⁰Nga tsa jngo xita nda síhitjasòn ijye kjotéxoma, tanga tsa ta jngo-ni 'én ra tíchja ya kjotéxoma kotonè-la, takó skané jé-la, nga 'koaá ngoya-la koni tsa nijngo kjotéxoma tísíhitjasòn-ni. ¹¹Tsa 'koaá 'sín kitsò Nainá: “Kì kjoachijngi 'nià”, tanga ti'koaá kitsò-te: “Kì xita nì'ken.” Tsa mì tsa kjoachijngi 'nié, tanga nì'ken-né xita, takó kjiné jé-ná ta ngatjì-la nga tíbatònè-lá jè kjotéxoma 'tse Nainá. ¹²Machjeén-ní nga síkondeé ijo-ná kó'sín nga 'sieén ko kó'sín nga kinákjeé, nga kijchò nichjin nga jè Nainá kiindajín-ná. Ko 'koaá 'sín kiindajín-ná koni 'sín nga tíchja jè kjotéxoma-la ra síkítsajnanidí-ni xita. ¹³Jñà ra tsin-la kjohimatakòn a'ta 'tse xita ra i'ka, ti'koaá mì kì jchahimatakòn-te 'kia nga kijchò nichjin nga sindajín-la ra kjoa 'tse jé-la. Tanga jñà ra tjín-la kjohimatakòn, jñà sìikijne 'kia nga kijchò nichjin nga sindajín-la.

Kjonda ra 'nié 'kia nga makjiín-ná

¹⁴Jiòn ra ndí 'ndsé xin-no, ¿mé chjí-la tsa yá ra kitso: “Ndaá makjiín-na ra a'ta 'tse Cristo”, tsa mì mé kjonda tí'sín-ni koni 'sín nga makjiín-la? ¿A komaá ta jè kjoa makjiín-la xita rakii, kochrjekàjin kjohi'in? ¹⁵'Koaá 'sín jngoya-la, tsa jngo ra 'ndsé chibé ko tsa jngo ndí chjoón ra tichjeé chibé, tsa tsin-la nikje ra faya ko tsa tsin-la tsajmì ra kjine ya nì'ya-la nga nichjin nchijòn, ¹⁶tsa tjín i'ka jiòn ra 'kín-la: “Tangí-la nda-nda-no, ya tsjaya nikje-no ko nda tichiod kó 'ki mejèn-no”, tanga tsa nímé tsajmì ra machjeén-la 'ki-la jiòn, nímé chjí-la nì'sín ta ko'sín 'kín-la. ¹⁷'Koaá tí'sín tjín-ni a'ta 'tse kjoa ra makjiín-ná, tsa mí mé kjonda ra ma-ná 'nié, nímé chjí-la koni 'sín nga makjiín-ná.

¹⁸Tanga tsa titsajnaá i'ka jìòn ra mejèn-no 'kín-ná: “¿A makjiín-li ra a'ta 'tse Cristo?” 'An, maá xín-la: “Jon, tísihítjasón-náa jè kjonda-la. Kò jì, ¿kò'sín koma kokón-náa nga makjiín-li a'ta 'tse Cristo, tsa mí kì tjinihitjasìn kjonda-la? Tanga ra 'an, tísihítjasón-náa kjonda-la; 'koaá ma-ni nga ma kokon-la nga ngi kixì kitií kjoa nga makjiín-na a'ta 'tse Cristo.” ¹⁹Jì, 'koaá 'sín makjiín-li nga jngoó-ni Nainá, kò ndaá tjin a'ta 'tse kjoa rakì; tanga jñà inìma 'cho-la níí, skanda tì'koaá makjiín-te-la ra jñà kò skanda fatsé-ní nga tsakjón-la. ²⁰Jì xìta ra tsìn-li kjòbítsjen, machjeén-ní nga nda katasijin-li, nga ní'sín kixé nga ndaá makjiín-ná, tanga tsa nímé kjoa ra nda tjin ma-ná 'nié, nímé chjì-la koni 'sín nga makjiín-ná. ²¹¿Mé-ni kò'sín kitsò-ni Nainá nga jè xìta jchínga-ná Abraham, xìta kixìí kjomà? ¿A mí tsa ki nga isihitjasòn 'kiá nga kiìkò i'ndí-la ra tsi'kìn Isaac ñánda nga tsakájasòn chrjò najò nga sù'ken koni jngo kjotjò ra tsjá-la Nainá tsiki? ²²¿A mí 'yi, nga ta jngoó kjoa kjomà-ni koni 'sín nga kjokjiín-la kò koni 'sín nga isihitjasòn jè Abraham? Kò 'kiá nga kò'sín isihitjasòn yaá kjòngoko-ni jè kjoa ra kò'sín kjokjiín-la. ²³'Koaá 'sín itjasòn koni 'sín tíchja xajòn ra tji'ta 'én-la Nainá nga tsò: “Abraham, ndaá kjokjiín-la a'ta 'tse Nainá; 'koaá 'sín kjomà-ni nga xìta kixì kitsò-la.” Kò 'koaá 'sín kijcha-la nga 'ñó nda tsakáko Nainá.

²⁴Yaá 'ya-la nga koó-te jñà kjoa ra nda 'sín xìta nga xìta kixì bitjongi ya ngixkon Nainá, kò mì tsa ta jè-ni nga kokjiín-la. ²⁵'Koaá tì'sín tjin a'ta 'tse chjoón chijngi ra tsi'kìn Rahab. Jè Nainá chjoón kixìí tsachrjengi ta ngatjì-la jè kjonda ra ki'sìn, 'kiá nga kitsjá'nde ya ni'ya-la nga isíkjáya-ni jñà xìta ra ta ijchòkatsjjen'ma kò ra kjomà askan-nioo tsasikóó-te nga ma xìn ndiyá kijì-ni jñà xìta kì. ²⁶Tsa nímé kjoanda inchibakeén a'ta 'tse kjoa makjiín-ná, jè kjoa makjiín-ná, 'koaá ngoya-la koni jngo mi'ken ra mì tì mé inìma tjin-la.

Kó'ki tse kjoa'cho tjen-kò ndijen-ná

3 ¹Jìòn ra 'ndsé xin-no, kì tà nga'tsi-no nga maestro 'nià ijo-no; nga ijyee 'ya-nájiòn, ngajìn ra bakon-ya-jìn, isaá tse kjohi'in sinè-najìn tsa mì kì nda sùtjasòn-jìn. ²Nga'tsí-né, kjín skoya-la kjoa'cho ra kajieén. Tsa tjin jngo xìta ra nímé kjoa'cho kàjin 'kiá nga chja, jè xìta rakì ngi xìta kixì-ní, kò

tì'koaá chíkjoaá-la nga ma-la s̄ikonda kóho'ki ijo-la nga mì ya skajin kjoa ra 'cho t̄jín. ³'Koaá ngoya-la koni jngo kabàyo 'kia nga sí'a freno tsa'ba, chíkjoako-ná nga ma basen-jyé kóho'ki jè ijo-la. ⁴'Koaá t̄i'sín t̄jín-te koni 'sín nga síxá j̄nà chitso. N̄i'sín 'n̄ó i'i kjòn, k̄o n̄i'sín 'n̄ó t̄jín-la nga'n̄ó t̄j̄o nga mejèn-la xìn iko, ta itsé saá-ni kich̄a ra 'mì timón ra síxáko-ni x̄ita nga ma f̄iko koni 'sín nga jè mejèn-la. ⁵'Koaá t̄i'sín t̄jín ra a'ta 'tse ndijen-ná, itsé saá-ni, tanga taxki maá-la kó'sín síkichja-ná k̄o ta yaá síkítsjeén kó'sín nga tsò. N̄i'sín ta itsé saa-ni ni'í ra kotse, batoó tse ij̄ná bakángi. ⁶Jè ndijen-ná 'koaá 'sín ngoya-la koni jngo ni'í; yaá 'ya tsjé tsje nga'tsi kjoa'cho ra t̄jín ya isà'nde; itsé saá-ni nga k̄ijina'a ya ndsa'bé, tanga maá-la tsjá 'chin-la kóho'ki ijo-ná, 'koaá ngoya-la koni jngo ni'í ra t̄ibaká nga t̄jingo k̄jobinachon-ná skanda nga'tsi n̄ichjin nga bitsakeén, k̄o jè ni'í rak̄i yaá nchrabá-ni n̄anda t̄jín k̄johi'in ra mì fehe'ta. ⁷J̄nà x̄ita, maá chíkjoaá-la nga sí'ndé nga'tsi cho ra t̄jín ya isà'nde, koni tsa j̄nà cho ra 'n̄ó 'tsen, k̄o j̄nà ra t̄jín-la najngá, k̄o j̄nà ye, k̄o j̄nà cho ra t̄jín ya angi ndáchikon. ⁸Tanga nijngo x̄ita ra ma-la sí'ndé ndijen-la. Nga jè ndijen-ná jngoó kjoa'cho t̄jín-la ra mì k̄i tsjá'nde nga ma ma'ndé k̄o yaá kitse 'chin ra koni xán-la ye ra sí'ken-ná. ⁹Tijé-ni ndijen-ná jeya níkjina-né Nainá ra Na'in 'mì-lá, k̄o tijè nakjoájno-lá x̄ita ra jè Nainá tsikínda koni 'sín 'ki ra jè. ¹⁰Ta jngoó ndsa'bé bitjo-ni 'én ra jeya níkjina-né Nainá k̄o jè 'én 'cho ra nakjoájno-lá x̄ita. Jiòn ra ndí 'ndsé xin-no, j̄nà kjoa k̄i, mì k̄i t̄jínè-la nga ko'sín koma. ¹¹Jngo ngajo n̄anda tíbitjo nandá, mì k̄i koma t̄iya k̄itjo-ni nandá tsje k̄o nandá t̄jé. ¹²J̄nà yá-la to igo, ¿a komaá to-la ítjachó koja-la? K̄o jè na'n̄ó tatsjé, ¿a komaá to igo koja-la? Jiòn ra ndí 'ndsé xin-no, 'koaá t̄i'sín t̄jín ra a'ta 'tse nandá, mì k̄i koma tajngo ngajo k̄itjo-ni nandá tsje k̄o nandá t̄jé.

Kó'sín t̄jín kjoachj̄ine ra nchrabá-ni ján ngajmi

¹³Tsa títsajin i'ka-najiòn j̄nà ra 'n̄ó chj̄ine k̄o ra 'n̄ó nda machiya-la, 'koaá 'sín kata'ya-la nga ndaá inchis̄jchá ijo-la, kó'sín nga 'ndé t̄jín ikon a'ta 'tse kjoachj̄ine ra t̄jín-la. ¹⁴Tanga tsa ngi ta kjoaxitakòn kitsejín inima-no k̄o tsa tà jé mejèn-no nga jiòn kitsahijyo ítjòn ki'ta, k̄i tà chj̄àn ko'sín níkítsjen nga ndaá inchi'nià, k̄i kjoa ndiso níkójìòn k̄o kjoa ra kixi

tjín. ¹⁵Jñà kjoachjine kii, mì tsa a'ta 'tse Nainá nchrabá-ni. Ta 'tse isà'nde-ní, kò ta kjobítsjen 'tse xita-ní, kò a'ta 'tseé xita-ní nchrabá-ni. ¹⁶Ya nánda nga tjín kjoaxitakòn kò jè kjobítsjen ra ta jè mejèn-ná nga jién kitsahijyo ítjén, ya ijndáa ta maskáya-là kjobítsjen-ná kò yaá ijncha nga'tsi kjoa ra 'cho tjín. ¹⁷Tanga jñà xita ra tjín-là kjoachjine ra a'ta 'tse Nainá nchrabá-ni, tsjeé síjchá ijo-là, kjoa'nchán bátsji, kjoandaá ra 'sín, xita 'ndé-ní, tjín-là ra kjoahimatàkòn, kji'tá nichjin nda tjín kjoa ra 'sín, xita kixi-ní, kò mì tsa jò fi-ni. ¹⁸Jñà xita ra mejèn-là nga kjoa'nchán kata'se, ítjòn 'nchán bitsajnakò jñà xita ra 'ka mé-ni nga askan-nioo ma sakò-là jè kjonda ra kixi tjín.

Jñà ra ya báhijtakò kjoa ra tjín ya isà'nde

4 ¹¿Nánda nchrabá-ni jè kjoachán kò jè kjoa nga kò'sín bixkàn-kjo jìòn? ¿A mí tsa ya nchrabá-ni a'ta 'tse kjoa'cho ra mejèn-no 'nià, ra 'nó kjaán-kò jè inìma-no? ²Mején-najìòn nga 'se-no ta mé tsajmì-ni, tanga mì kì sakó-no, yaá nchrabá-ni nga nì'ken jìòn xita xàngioo nga batoó tíjjin ya inìma-no ra kjoaxitakòn 'mì, mì kì sakó-no mé ra mejèn-no; 'koaá ma-ni nga bixkàn-kjo kò akjòn sakó-no ra kjoachán 'mì. Mì kì sakó-no mé ra mejèn-no, ta ngatjì-là nga mì tsa níjé-la Nainá. ³Kò tsa 'kia nga níjé-la jìòn Nainá, mì kì 'bì-najìòn, ta ngatjì-là nga 'choó níjé jìòn; ta jé ra mejèn-najìòn nga ya sichjeén a'ta 'tse kjoatsja ra sasén-là ijo-no. ⁴Jìòn, xita ra mì tsa kixi 'nià a'ta 'tse Nainá, ¿a mí 'ya jìòn, nga tsa 'kia jè kotsjacheé jñà kjoa'cho ra tjín i isà'nde, jé Nainá kondra inchimangí-lá? Nga nga'tsi xita ra jè matsjake kjoa'cho ra tjín i isà'nde, kondraá fi-là Nainá. ⁵¿A bixó-najìòn, tsa ta 'koaá tsò jè xajon ra tíj'ta 'én-là Nainá, 'kia nga tsò: “Jè Inìma Tsje ra Nainá kitsjá-ná, batoó 'nó machini ta ngatjì-là nga batoó nda matsjake-ná”? ⁶Tanga jè Nainá isaá nda basìkò-ná nga tsjá-ná kjonda-là. 'Koaá ma-ni nga kò'sín tsò jè xajon ra tíj'ta 'én-là Nainá, nga tsò: “Jè Nainá kondraá tíjna-là jñà xita ra 'nga ikon, tanga tseé kjonda tsjá-là jñà ra ndí xita 'ndé.” ⁷Ti'nde nga jè Nainá katatéxoma-no, tanga titája-la jè xita-ní, kò kjabeé kosen'táxín-no. ⁸Tichraña'ta-la Nainá mé-ni nga ti'koa jè Nainá sìchraña'ta-no. Jìòn ra fatsji-jé, ta kjoatsje ra 'tiaàn jìòn 'ndi-ni ra a'ta 'tse Nainá, mé-ni nga jñà ndsaà katatsje-ni.

Ko jìòn ra ta jò t́jín takòn nga ko'ki matsjacha jè Nainá ko ko'ki matsjacha jè kjoa 'tse isà'nde, t́tsje jè kjobítsjen ra t́jín ya inìma-no mé-ni ngi tsje katijna-ni. ⁹Ñó t́ikájno, chj́ndáya ko ajò katama-la inìma-no tà ngatjì-la nga jé t́jín-no. Jè kjoa bijnòcha-no, ndáxkon katama-ni; ko jè kjoatsja-no, kjobaá katama-ni. ¹⁰Ñó nangi t́ikítsajna ijo-no ya ngixkon Na'ín-ná mé-ni nga jè 'nga s̀ikíjna-no.

¹¹Jìòn ndí 'ndsé, k̀i xàngioo nakjoájno-la nga jngó jngó-no ko ra ìjngo ko ra ìjngo. Nga jè ra ko'sín chjajno-la 'ndse nga bánè jé-la, chjajno-la jè kjotéxoma-la Nainá ko t́i'koaá bánè jé-la. Tsa jì ra ko'sín nakjoájno-la jè kjotéxoma, mì tsa tjinihitjasòn-jìn, ta isaá jnchro jì tji'nì ijo-li koni jngo xitaxá ra bíndajín jè kjotéxoma. ¹²Jngoó-ni jè ra ma-la tsjá kjotéxoma, t́jé-ni xitaxá ra ma-la bíndajín, ko t́jé-ni ra ma-la s̀ikatojin-ná kjohi'in ko t́i'koaá ma-la k̀inè-ná kjohi'in. Tanga, çyá-ni ra jì, nga jì fanè jé-la xitá xàngii?

'Én 'nga ikon

¹³Nda tiná'ya jìòn xitá ra k̀i'sín bixó: “Ndi 'ndi ko ñá tsa nchijòn, yaá kjieén ya naxindá rakìò, jngo nó ya kitsajnee nga kotinayeé tsajmì ko ndaá kijne-ná ton.” ¹⁴Ko nda mí 'ya-najìòn, mé ra koma'tin jìòn nichjin ra 'sa nchrabá. Jìòn, ta 'koaá 'sín ngoya-la koni jè ifi-xa, ta jngohíjtaá mangaya t́jngo-ni, ko ta jngohíjtaá feheya-ni. ¹⁵Jè ra machjeén tsa k̀i'sín kixó jìòn: “Tsa jè Na'ín-ná ra ko'sín mejèn-la nga tsjá-isa-ná kjobinachon, komaá-la 'sieén ta mé xá-ni.” ¹⁶Tanga ra jìòn, batoó nakjoá jìòn ra 'én 'nga ikon, ko taxki nakjoá-nájìòn a'ta 'tse kjoa ra nda mí k̀i 'ya jìòn kó'sín t́jín kjòn-ni. Nga'tsi 'én 'nga ikon ra ko'sín nakjoá jìòn, batoó 'cho t́jín. ¹⁷Jè xitá ra be kó'sín t́jín kjoa ra nda t́jín, ko mì k̀i tsa ko'sín 'sín-ni, t́bátsji-jé-la ijo-la.

Tjen sijna chiya-la ra xitá nchiná

5 ¹Tiná'ya jìòn ra xitá nchiná 'mì-no. Chj́ndáya ba ba nga 'ñó tse kjohi'in t́jín-ni ra t́inchrobánè-no. ²Jè kjoanchiná-no ijyee tífi'ndo ko nga'tsi j́nà nikje-najìòn ijyee ijye-la j́nà cho inda. ³J́nà ton sinè ko j́nà ton chroba ra t́jín-no ijyee títjochi. Ko jé chi-la kokòn ra kondra tsajìòn jè nichjin 'kia nga sindajín, nga ní'í jtì-ni nga t́jngo ijo-no. Ngì

ta *inchiminchaxkó*-nó *kjoanchiná*-no skanda 'ndi, ni'sín ijye tífehe'ta *nichjin*. ⁴ Jñà ndí *xita* *chí'nda* ra *isíxá*-no, jñà ra mì kì *tsikíchjí*-la *jiòn*, *batoó* 'ñó *inchikjindáya* nga *inchifajé*'ta-la *Nainá* ra *kondra* *tsajiòn*, *ko* jè *Nainá* ra *bato* tse nga'ñó *tjín-la*, *ijyeé* *kií'nchré* koni 'sín *inchifajé*. ⁵ *Jiòn* *batoó* *nda* *titsajna* *i* *isà'nde* *ko* *batoó* *nda* *inchi*'bì-la *kjotsja* jè *ijo*-no. *Inchinisiín*-la *inìma*-no nga *inchi*'bì-la *kjotsja* ra *síjé* *ko* *nda* *mí* 'ya-no tsa *ijyeé* *ijchò* *nichjin* nga *kiyá* *jiòn*. ⁶ *Jñà* ra *xita* *kixi* ra *nimé* jé *tjín-la*, *jiòn* *fanè* *jé-la*, *ko* *nì'ken*-no. *Ko* *jñà* *xita* *kìi*, *nda* *mí* *basikotji* *ijo-la*. Ta *tsjá'nde* *kjonda*-ní nga *nì'ken* *jiòn*.

Kjoa ra 'sieén 'kia nga tikje 'fiì jè Cristo

⁷ *Koaá* *ma*-ni *jiòn* *ndí* 'ndsé, *jchíñakjoa*-la *jiòn* skanda 'kia nga *kj'íi* *india*-ni jè *Na'ín*-ná. *Ko*'sín 'tiààn koni 'sín 'sín jè *ndí* *xita* ra *ma-la* *síxáko* *nangi*, nga *koñá* *kjoaà*-la *nda* *nda* nga 'koa *jtsí* ra 'ba *ítjòn* *ko* ra *askan* 'ba, nga *tsjá* nga'ñó-la nga *mihijin* *jñà* *tsajmì* *tjé*, *mé*-ni *koma* nga *sakò-la* *jñà* *to-la* ra 'ñó *chjí-la*. ⁸ *Koa* *tí'sín* *jchíñakjoa*-la *nda* *nda* ra *jiòn*, *kì* *tà* *chjàn* *nìkjahajen*-la *takòn* nga *ijyeé* 'ñó *kjimachraña* jè *nichjin* nga *kj'íi* *india*-ni jè *Na'ín*-ná.

⁹ *Jiòn* *ndí* 'ndsé, *kì* *xàngioo* *tsajé*-la nga *jngó* *jngó*-no nga *bixó*: “*Choó* *tísíko*-na jè *xita* *rakìi*”, *mé*-ni nga *mì* *kjohi'in* *sinè*-no, nga jè *Xitaxá* ra *ma-la* *bíndajín-la* *xita*, *ijyeé* *tínchrabá* *chraña*. ¹⁰ *Jiòn* ra 'ndsèè *xin*-no, *chjín**gi*-la koni 'sín nga *isìkjiín* *kjohi'in* *ko* nga *ichìkjoa-la* *jñà* *xita* ra *isìchjeén* *Nainá* nga *kiichja* *ngajo-la*, 'kia nga *kiichja* ra *a'ta* 'tse. ¹¹ *Koaá* 'sín *ijye* 'ya-la nga *batoó* *nda-la* *jñà* *xita* ra *chí**kjoajin-la* jè *kjohi'in* ra 'se-la. *Ijyeé* *ina*'yá *jiòn* koni 'sín nga *ichìkjoajin-la* jè *xita* ra *tsi'kin* *Job* *jñà* *kjohi'in* ra *ki'se-la*, *ko* *ijyeé* 'ya-ná*jiòn* koni 'sín nga *isìko* *Na'ín*-ná nga *ijyehe'tà*-ni *kjoa*; nga jè *Na'ín*-ná *batoó* tse *kjohimatakòn* *tjín-la* *ko* *batoó* *nda* *xita*.

¹² *Tanga* jè ra *isa* 'ñó *chjí-la*, *jiòn* *ndí* 'ndsé, *jè*-ní 'kia nga 'kiòè 'én-no, *kì* *tà* *chjàn* *yá* ra *nikàxkiòo* nga *bixó*: “*Tíbe*-ní”. *Ko* *kì* *tà* *chjàn* *bixó*: “*Tíbeé* jè *ngajmì*”. *Ko* *tí*'*koaá* *kì* *tà* *chjàn* *bixó*: “*Tíbeé* jè *nangi*”, *ko* ra *kj'íi*-*isa* *tsajmì*. Tsa 'kia nga *kixó* *jiòn*: “*Jon*, 'koaá 'sín *tjín*”, 'koaá 'sín *tìhitjasòn*. *Ko* tsa 'kia nga *kixó* *jiòn*: “*Majìn*”, 'koaá 'sín *tìhitjasòn*, *mé*-ni nga jè *Na'ín*-ná *mì* *kjohi'in* *tsjá*-no.

Kótjín ndiyá-là nga ma kítsa'beé

¹³Tsa tjín i'ka jiòn ra ba tjín-no, tìnákjoa'ta-la Nainá; ko tsa tjín i'ka jiòn ra tsja tjín-no, tìjndá-la Nainá nga jeya tìkíjna. ¹⁴Tsa tjín i'ka jiòn ra 'chin tjín-no, tìnákjoa-la jñà xìta jchínga ra tjín-là xá a'ta 'tse naxindá-là Cristo mé-ni nga katabítsa'batjì-no kò a'ta 'tse 'í-là Na'ín-ná katamahíjno-no sihìti. ¹⁵Tsa nda makjiín-no 'kia nga kítsa'ba'tion jñà xìta ra kiya, kondaá-ni jè 'chin-là; kò jè Na'ín-ná siikasítjen-ni; kò tsa mé jé ra tsakátsji, sihijcha'ta-là. ¹⁶Koaá ma-ni nga machjeén-ní nga 'tènjmí kañá-la xàngioo mé jé ra tjín-no nga jngó jngó-no, kò títsa'batjì kañá xàngioo nga jngó jngó-no, mé-ni katanda-no tsa mé 'chin ra tjín-no. Nga tsa 'kia jngo xìta ra kixi tìjna ya ngixkõn Nainá, jè kjoa bitsa'ba-là, batoó tjín-là nga'ño nga manda-ni xìta. ¹⁷Jè xìta ra isìchjeén Nainá nga kiichja ngajo-là ra tsi'kìn Elías, 'koaá 'sín ta xìta isà'nde kjomà koni ra jién. 'Nó tsikítsa'ba-là Nainá nga isíjé-là, nga mì tì jtsí kata'ba-ni, kò ján nó masen mì kì tì 'tsa-ni jtsí. ¹⁸Ra kjomà askan, tsikítsa'baá india-là Nainá nga kata'ba india-ni jtsí, kò 'tsaá india-ni jtsí ra i'ngaá inchrabà-ni kò jè nangi india kitsjá-ni kjonda nga tsajà to-là tsajmì ra isìtje.

Mé kjonda ra sakó 'kia nga jngo ra tíbátsji-jé nikasítjeén

¹⁹Jiòn ndí 'ndsé, tsa tjín i'ka jiòn ra tsincha'taxìn-là ra a'ta 'tse kjoakixi-là Nainá, kò tsa tjín jngo xìta ra siikáfa india-no nga siikixiya-no, ²⁰kò'sín katasijin-no, tsa jngo xìta ra ijye jé tíbátsji nga ya tsá'baya jè ndiyá ra mì kì nda tjín, kò tsa jngo xìta kò'sín kitso-là nga kátáfa'ta india-ila jè Nainá, yaá tìbachrjekàjin jè kjohi'in ra 'tse kjobiya, kò 'koaá 'sín tísíko nga 'ño tse jé sihijcha'ta-là Nainá jè xìta rakì.